

YELSOMINE QUILOTTE GANADORA ABSOLUTO DI INTERNATIONAL COSTUME FESTIVAL



ORANJESTAD(AAN):----
Cinco di e seis premionan di Festival internacional di costume di carnaval a ser gana pa representantenan di Aruba den un anochi casi manera un "anochi di cuenta di hadas".

E representante Yelsomine Quilotte a gana 2 prome lugar y un di dos lugar, mientras cu Omayra de Cuba a logra un prome lugar y un di dos lugar e anochi aki.

Yelsomine a gana prome premio cu su traha "Bird of Paradise" den categoria di Costume mas impactante, mientras cu e representante di St. Maarten Julio Rooi a termina na di dos lugar cu "King Neptune". Julio Rooi tabata candidato fuerte pa e titulo aki y a causa un impacto ora cu el a presenta den prome parti di e programa dunando indicacion caba cu e ta un aspirante fuerte.

Prome Premio, Yelsomine a gana tambe den categoria Costume mas creativo y aki e tabata tin como rival grandi Omayra de Cuba, pero tambe Ruth Croes di Aruba y Juan Geerman di Hulanda.

Omayra de Cuba cu su "Dance Festival" a conquista di dos lugar.

Den categoria di Costume mas Original, e ganadora a resulta Omayra de Cuba di Aruba cu Yelsomine na di dos lugar.

Mester menciona sinembargo cu si presencia e show aki por bisa cu cada un di e participantenan ta un ganador caba pasobra locual nan a presenta tabata costumnan sumamente bunita.

E anochi di competencia no tabata presente representantenan di Brasil ya cu nan no a logra vuelo pa ta na Aruba pa e anochi aki, y a keda pa presenta den e di dos anochi di show.

Den prome parti di e show a ser presenta costumnan di Lilia Maduro y Ester Thijssen "Fiesta Tailandes" cu tabata precioso pero no impactante pa por a cay den premiacion, pero si a duna e indicacion cu lo por spera un joya di show.

Jolanda Jansen cu su "Aruba y su Rikese y Naturalesa" tambe tabata masha bunita y a impacta mas tanto, specialmente pa su descripcion di cada figura riba e traha.

Lionel Jagasser di Trinidad a presenta cu "Lone Fox" a duna un bon presentacion y den originalidad y creatividad e por a haya bastante bon punto.

"Cleopatra" di Mildred Kerkeboom di Hulanda tambe tabata un preciosidad pero sin e Cobra e lo tabata hopi mas impactante, mientras cu e cobra a duna supuntionan sigur den originalidad y creatividad.



Melania Neuman di Aruba tambe tabata bon representa cu su "Fantasy of 1001 night". E no tabata impactante pa a cay den premio, pero cu creatividad y originalidad si a sobresali mas, mescos tabata cu Erica Acunbero di Aruba cu su "Fiesta Tropical".

Despues di e presentacion impactante di Julio Rooi, a presenta Zusy Angela di Bonaire cu "Paz Mundial". Un presentacion cu a impacta bastante pero no suficiente pa premiacion. Nan creatividad tabata grandi y e splicacion amplio duna di e costume aki tabata sublime.

E originalidad tambe tabata impresionante, sinembargo no suficiente tampoco pa a logra un di e premionan. E progreso si pa carnaval di Bonaire por a ser nota y publico a duna Bonaire un sosten grandi for di momento cu Zusy a presenta cu e creacion di Farid Ajubi, y logra un representacion formidable pa nan isla.

"Reina di indiannan poderoso" di Jeanice Scheper tambe tabata un di e costumnan admirable di e anochi aki. Su creatividad y originalidad tabata mas fuerte cu su impacto sinembargo. El a duna Aruba un representacion digno, mescos cu Virginia Maduro cu "Purple Beauty".

Frido Kelly di Hulanda cu "Birds" a falta mas creatividad pa por a haci su costume mas impactante, pero a luci riba escenario.

Omayra de Cuba a sobresali den Originalidad y Creatividad, superando Yelsomine den originalidad cu su

"Dance Festival" pero a wordo surpasa pa Yelsomine den creatividad.

Un punto masha comenta di Yelsomine tabata cu su costume combina cu e colornan di e pieza y su color di cuero y maquillaje tabata den un tono cu otro, di manera cu por a mira riba escenario un pieza completo y precioso.

Yelsomine a impacta masha hopi aki cu "Bird of Paradise" pa por a gana "King Neptune" di Julio Rooi finalmente.

E dos trahenan fuerte pa premio den impactante pero cu no a logra tabata di Ruth Croes "The Enchanted Bird" cu enverdad tabata un preciosidad y fuerte den tres categoria di e anochi, y "Fantasy Explosion" di Juan Geerman representando Hulanda.